

濂

溪

志

刻濂溪周先生遺書
書院藏書

余不敏寤寐見先生久矣

年十三四時頗知志學獲性

理書讀之開卷即讀先生書

于是志學之念益切益惡世

利世色苟終身盤谷焉已矣

既讀先生書益久恍然如遇

其人再徧訪事實得全書讀

之更見先生為政嚴毅清勵

慈祥仁恕心更切切慕焉時

潛弗見已矣見必先生政是

師蓋政以行學政帶正則學

斯弗善。豈曰讀書之士。故不

必仕。亦不必不仕。有其政。斯

見其學。然而誠本也。主靜。極

也。無欲。要也。握其本而極是

立。惟無欲之要。宰之。則洗心

于密者。即彌綸參贊之謨。凡

亘天亘地事業。即浮雲一點
過太虛。無着礙。無方所也。如
是方可以話太極見先生。先
生道州人。毓堪與今古之秀
而曰溪曰巖曰故里特寄產
之一。然詢方履跡亦所不廢。

余既填撫三楚喜遊先生鄉
問先生里新其祠廣其田育
其後裔建其書院胥令太守
發董之成仍成其志用告誠
周氏子孫而宗子翰博君聯
官率族姓而久引承之

萬曆二十有一年冬十月十
有二日壬辰

賜進士第嘉議大夫戶部右侍
郎前都察院協理院事左副
都御史北地李楨謹序

濂溪先生志序

蓋嘗讀孔氏世家史遷贊孔子以布衣傳十餘世為學者宗而自天子王侯中國言六藝者折衷於孔子以為至聖夫孔氏之統實祖堯舜而續文周寧第以六藝為功而所

稱傳十餘世者則遯獲麟之
年以迨龍門之元符固自其
世計之而不知其與天地參
而四時同也孟軻氏歿斯道
幾熄即遷猶能以世家尊孔
子而其後俗儒雲興門戶決
裂權謀功利訓詁枝葉之習

入於統之內而為道。蟲棄倫
絕聖。悠玄空寂之譚。出於統
之外而與道敵。歷千餘禩而
卒未有儻然一明孔子之道
者。何恣恣也。濂溪先生起宋
天禧間。其學絕無所繇傳。獨
湛思微妙。著太極一圖以授

河南兩程子。迄今圖說易通。
二書。學士家尊之。與六經等。
大指以誠為基。以一為要。以
主靜立人。極為至。其說奧渺。
精深。而其造端。雖經生學子。
循日用而可守。於是尼山日
月。結為大年。而叔季漫漫之

長夜昭然如昨。斯豈非再闢
渾淪千鈞一髮者與。跡生平
陸沉郡邑。所至澤物省冤。不
難投手板以明志。迨宦遊既
倦。遂丐身於匡嶽衡麓之間。
而吟弄以老。其仕止久速。殆
壹稟孔氏家法者。故尊孔子




則必尊先生。而志先生者乃所以志孔子也。今讀志自圖書文辭年表世系與夫儒詰表章帝王褒崇之典不啻胠列而先生之精神命脉於是焉在。斯以闡繹萬折衷之非無具矣。嗟乎八之之為畫也。


五之之為圖也圖書文辭年
表世系之為志也旦暮遇者
存聖人之神而揣籥望燭者
且不免為畫為圖為志則是
集直家乘門譜與司馬氏世
家奚異焉非克菴李公意也
後有繹道統者當得於是志


之外矣

賜進士中憲大夫巡撫湖廣提
督軍務兼制黎平等處地方
都察院右僉都御史晉江郭
惟賢謹撰


濂溪周先生書院圖









月巖圖






萬曆庚戌鼎建



周濂溪先生真像



像贊

道喪千載聖遠言湮
不有先覺孰開我人
書不盡言圖不盡意
風月無邊庭草交翠

晦菴朱熹題

古今紀述題詠姓氏

胡銓 黃庭堅 傅者 任大中 章濬

胡寅 李大臨 郭見義 龔維蕃 趙柳夫

朱熹 孔文舉 盧方春 歐陽玄 滕巽真

蔡杭 柴中行 陳宗禮 度正 魏嗣孫

趙朴 魏了翁 灌定之 林煥 熊昱

蘇軾 潘興嗣 黃仲芳 薛綱 韓湯

張栻 何平仲 沈鍾 謝鐸 沈慶

陳獻章 黃芳 趙宗憲 周晉 周冕

李夢陽 歐陽旦 張弼 陸深 何遷

盛祥方進蔣忠姚昂徐瑚

王守仁趙宏何文俊陳晶李敷

唐珪吳廷舉曾仁錢源蔣灝

邵寶方良弼陳鳳梧呂獻徐愛

葉盛曹宏林山周縉麟蔣天相

顧璘于致祥符鍾雷復陳鎰

廖紀莫英杜漸高穀金潤

趙賢陳鑑方瓊黃俊方傑

李楨曾鼎王縝陳騏抑邦傑

郭惟賢顏鯨張勉學胡直侯廷訓

傅楫 戴嘉猷 王會 蕭子鵬 周子恭

張喬松 王宗尹 曾承恩 曹來旬 趙海

盧仲佃 戴科 張守剛 慕光 蔣春生

吳中傅 閃應暘 李發 王時春 董汝第

魯朝節 丁懋儒 黃廷聘 黃應元 李東方

管大勳 謝旣 吳能進 呂繼胤 車登雲


顧憲成 孫成泰 韓子祁 錢達道 周誌

王一之 許宗曾 陳文進 李炯 楊大行

孟養浩 蘓茂相 蔡體仁 曾可立 楊如春

楊載杭 陳之京 應世科

太極圖



周子曰無極而太極太極動而生陽動極而靜靜而
 生陰靜極復動一動一靜互為其根分陰分陽兩儀
 立焉陽變陰合而生水火木金土五氣順布四時行

馬五行一陰陽也陰陽一太極也太極本無極也五行之生各一其性無極之真二五之精妙合而凝乾道成男坤道成女二氣交感化生萬物萬物生生而變化無窮焉惟人也得其秀而最靈形既生矣神發知矣五性感動而善惡分萬事出矣聖人定之以中正仁義而主靜立人極焉故聖人與天地合其德日月合其明四時合其序鬼神合其吉凶君子修之吉小人悖之凶故曰立天之道曰陰與陽立地之道曰柔與剛立人之道曰仁與義又曰原始反終故知死生之說大哉易也斯其至矣

通書

誠上第一

誠者聖人之本大哉乾元萬物資始誠之源也乾道變化各正性命誠斯立焉純樸至善者也故曰一陰一陽之謂道繼之者善也成之者性也元亨誠之通利貞誠之復大哉易也性命之源乎

誠下第二

聖誠而已矣誠五常之本百行之源也靜無而動有至正而明達也五常百行非誠非也邪暗塞也故誠則無事矣至易而行難果而確無難焉故曰一曰克

已獲禮天下歸仁焉

誠幾德第三

誠無為幾善惡德愛曰仁宜曰義理曰禮通曰智守
曰信性焉安焉之謂聖復焉執焉之謂賢發微不可
見克周不可窮之謂神

聖第四

寂然不動者誠也感而遂通者神也動而未形有無
之間者幾也誠精故明神應故妙幾微故幽誠神幾
曰聖人

慎動第五

動而正曰道用而和曰德匪仁匪義匪禮匪智匪信
悉邪也邪動辱也甚焉害也故君子慎動

道第六

聖人之道仁義中正而已矣守之貴行之難也
天地豈不易簡豈為難知不守不行不廓爾

師第七

或問曰曷為天下善曰師曰何謂也曰性者剛柔善
惡中而已矣不達曰剛善為義為直為斷為嚴毅為
幹固惡為猛為隘為疆梁柔善為慈為順為巽惡為
懦弱為無斷為邪佞性中也者和也中節也天下之

達道也。聖人之事也。故聖人立教，俾人自易其惡，自
至其中而止矣。故充覺覺後覺，闇者求於明而師道
立矣。師道立則善人多，善人多則朝廷正而天下治
矣。

幸第八

人之生不幸不聞過大不幸無耻必有耻則可教聞
過則可賢

思第九

洪範曰：思曰睿。睿作聖。無思本也。思通用也。幾動於
彼，誠動於此。無思而無不通為聖人。不思則不能通。

微不昏則不能無不通是則無不通生於通微通微
生於思故思者聖功之本而吉凶之機也易曰君子
見幾而作不俟終日又曰知幾其神乎

志學第十

聖希天賢希聖士希賢伊尹顏淵大賢也伊尹耻其
君不為堯舜一夫不得其所若撻於市顏淵不遷怒
不貳過三月不違仁志伊尹之所志學顏子之所學
過則聖及則賢不及則亦不失於令名

頌化第十一

天以陽生萬物以陰成萬物生仁也成義也故聖人

在上以仁育萬物以義正萬民入道行而萬物順聖
德修而萬民化大順大化不見其迹莫知其然之謂
神故天下之衆本在一人道豈遠乎哉術豈多乎哉

治第十二

十室之邑人人提耳而教且不及况天下之廣兆民
之衆哉曰純其心而已矣仁義禮智四者動靜言貌
視聽無遠之謂純心純則賢才輔賢才輔則天下治
純心要矣用賢急焉

禮樂第十三

禮理也樂和也陰陽理而後和君君臣臣父父子子

兄兄弟第夫夫婦婦萬物各得其理然後和故禮先而樂後

務實第十四

實勝善也名勝耻也故君子進德修業孳孳不息務實勝也德業有未著則恐恐然畏人知遠耻也小人則偽而已故君子日休小人日憂

愛敬第十五

有善不及曰不及則學焉問曰有不善曰不善則告之以不善且勸曰庶幾有改乎斯為君子有善一不善二則學其一而勸其二有語曰斯人有是之不善

非大惡也則曰孰無過焉知其不能改改則為君子矣不改為惡惡者天惡之彼豈無畏邪烏知其不能改故君子悉有衆善無弗愛且敬焉

動靜第十六

動而無靜靜而無動物也動而無動靜而無靜神也動而無動靜而無靜非不動不靜也物則不遷神妙萬物水陰根陽火陽根陰五行陰陽陰陽太極四時運行萬物終始混兮闢兮其無窮兮

樂上第十七

古者聖王制禮法修教化三綱正九疇叙百姓太和

萬物咸若乃作樂以宣八風之氣以平天下之情故
樂聲淡而不傷和不滯入其耳感其心莫不淡且
和焉淡則歡心平和則躁心釋優柔平中德之盛也
天下化中治之至也是謂道配天也古之極也後世
僮法不修政刑苛紊縱欲敗度下民困苦謂古樂不
足聽也代變新聲妖淫恣怨導欲增悲不能自止故
有賊君棄父輕生敗倫不可禁者矣嗚呼樂者古以
平心今以助欲古以宣化今以長怨不復古禮不變
今樂而欲至治者遠矣

樂中第十八章

樂者本乎政也政善民安則天下之心和故聖人作樂以宣暢其和心達于天地天地之氣感而太和焉天地和則萬物順故神祇格鳥獸馴

樂下第十九章

樂聲淡則聽心平樂辭善則歌者慕故風移而俗易矣妖聲豔辭之化也亦然

聖學第二十章

聖可學乎曰可曰有要乎曰有請聞焉曰一為要一者無欲也無欲則靜虛動直靜虛則明明則通動直則公公則溥明通公溥庶幾乎

公明第二十一

公於已者公於人未有不公於已而能公於人也明不至則疑生明無疑也謂能疑為明何啻千里

理性命第二十二

激彰厥微匪靈弗瑩剛善剛惡柔亦如之由焉止矣
二氣五行化生萬物五殊二實二本則一是萬為一
一實萬分萬一各正小大有定

顏子第二十三

顏子一簞食一瓢飲在陋巷人不堪其憂而不改其樂夫富貴人所愛也顏子不愛不求而樂乎貧者獨

人燕溪志卷之三
九
何心哉天地間有至貴至愛可求而異乎彼者見其
大而忘其小焉爾見其大則心泰心泰則無不足無
不足則富貴貧賤處之一也處之一則能化而齊故
顏子亞聖

師友上第二十四

天地間至尊者道至貴者德而已矣至難得者人人
而至難得者道德有於身而已矣求人至難得者有
於身非師友則不可得也已

師友下第二十五

道義者身有之則貴且尊人生而蒙長熙師友則愚

是道義由師交有之而得貴且尊其義不亦重乎其聚不亦樂乎

過第二十六

仲由喜聞過令名無窮焉今人有過不喜人規如護疾而忌醫寧滅其身而無悔也

勢第二十七

天下勢而已矣勢輕重也極重不可反識其重而亟反之可也反之力也識不早力不易也力而不競天也不識不力人也天乎人也何尤

文辭第二十八

文所以載道也輪蘇飾而人弗庸徒飾也况虛車乎
文辭藝也道德實也篤其實而藝者書之美則愛愛
則傳焉賢者得以學而至之是為教故曰言之無文
行之不遠然不賢者雖父兄臨之師保勉之不學也
強之不從也不知務道德而第以文辭為能者藝焉
而已噫弊也久矣

聖蘊第二十九

不憤不啓不悱不發舉一隅不以三隅反則不復也
子曰予欲無言天何言哉四時行焉百物生焉然則
聖人之蘊微顏子殆不可見發聖人之蘊教萬世無

窮者顏子也聖同天不亦深乎常人有一聞知來矣
不速知其有也急人知而名也薄亦甚矣

精蘊第三十

聖人之精畫卦以示聖人之蘊因卦以發卦不盡聖
人之精不可得而見微卦聖人之蘊殆不可悉得而
聞易何止五經之源其天地鬼神之奧乎

乾損益動第三十一

君子乾乾不息於誠然必慙念寤慙遷善改過而後
至乾之用其善是損益之大莫是過聖人之旨深哉
吉凶悔吝生乎動噫告一而已動可不慎乎

家人睽復無妄第三十三章

治天下有本身之謂也治天下有則家之謂也本必
端端本誠心而已矣則必善善則和親而已矣家難
而天下易家親而天下踈也家人離必起於婦人故
睽次家人以二女同居而志不同行也堯所以釐降
二女子媯汭舜可禪乎吾茲譏矣是治天下觀于家
治家觀身而已矣身端心誠之謂也誠心復其不善
之動而已矣不善之動妄也妄復則無妄矣無妄則
誠矣故無妄次復而曰先王以茂對時育萬物深哉

富貴第三十三

君子以道充為貴身安為富故常泰無不足而銖銖
刺寃塵視金玉其重無加焉爾

陋第三十四

聖人之道入乎耳存乎心蘊之為德行行之為事業
彼以文辭而已者陋矣

擬議第三十五

至誠則動動則變變則化故曰擬之而後言議之而
後動擬議以成其變化

刑第三十六

天以春生萬物止之以秋物之生也既成矣不止則

過焉故得秋以成聖人之法天以政養萬民肅之以刑民之盛也欲動情動利害相攻不止則賊戕無倫焉故得刑以治情偽微賤其變于狀苟非中正明達果斷者不能治也訟卦曰利見大人以剛得中也噬嗑曰利用獄以動而明也嗚呼天下之廣主刑者民之司命也任用可不慎乎

公第三十七

聖人之道至公而已矣或曰何謂也曰天地至公而已矣

孔子上第三十八

春秋正王道明大法也孔子為後世王者而修也亂
臣賊子誅死者於前所以懼生者於後也宜乎萬世
無窮王祀夫子報德報功之無盡焉

孔子下第三十九

道德高厚教化無窮實與天地參而四時同其惟孔
子乎

蒙艮第四十

童蒙求我我正果行如莖焉筮叩神也再三則瀆矣
瀆則不告也山下出泉靜而清也汨則亂亂不決也
慎哉其惟時中乎艮其背背非見也靜則止止非為

也為不止矣其道也深乎

元公雜著

文

養心亭說

孟子曰養心莫善於寡欲其為人也寡欲雖有不存焉者寡矣其為人也多欲雖有存焉者寡矣予謂養心不止於寡焉而存耳蓋寡焉以至於無無則誠立明通誠立賢也明通聖也是聖賢非性生必養心而至之養之善有大焉如此存乎其人而已張子宗範有行有文其居背山而面水山之麓構亭甚清淨予

偶至而愛之因題曰養心既謝且求說故畫以勉

愛蓮說

水陸草木之花可愛者甚蕃晉陶淵明獨愛菊自李
唐來世人甚愛牡丹予獨愛蓮之出淤泥而不染濯
清漣而不妖中通外直不蔓不枝香遠益清亭亭淨
植可遠觀而不可褻玩焉予謂菊花之隱逸者也牡
丹花之富貴者也蓮花之君子者也噫菊之愛陶後
鮮有聞蓮之愛同予者何人牡丹之愛宜乎衆矣

吉州彭推官詩序

博實慶曆初為洪州分寧縣上簿披外臺繼承乏表

州靈溪鎮市征之舟每縣載表之進士多來講學於
介齊因談及命朝派空律詩之工坐間誦吉州彭推
官詩者六七其句字信有能觀天巧而贈友人曰夫
我聞介寧新邑宰上表喻月而才明之譽已飛數百
里有謂博實曰邑宰太博思永即嚮所誦之詩推官
之子也吉與袁鄰部父先輩皆識推官第為善內樂
殊忘官之高卑齒之壯老以至於淡其憂將發於是
乎博實故又知推官之德暨還邑局聞推官之詩益
多亦能記誦不忘十五年而太博為邢部郎中直史
館益州路轉運使博實自南昌知縣就移僉署巴川

郡判官廳公事益梓鄰路也沂流赴局過渝州越三
舍接巴川境間有溫泉佛寺艤舟遊覽忽覩榜詩乃
推官之作喜謔讀訖錄本納于轉運公公復書重謝
且曰頽刻一石若蒙繼以短序尤荷厚意故存於詩
後而命工刻石置寺之堂焉實嘉祐二年正月十五
日云承奉即守太子中舍僉署合州軍事判官廳公
事周惇實撰

邵州遷學釋菜文

惟夫子道高德厚教化無窮實與天地參而四時同
上自國都下及州縣通立廟貌州守縣令春秋釋奠

雖天子之尊入廟廟衿行禮其重誠與天地參焉儒
衣冠學道業著列室於廟朝夕瞻睟容心慕至德
幾於顏氏之子者有之得其位施其澤及生民者代
有之然夫子之宮可忽歟而邵置於惡地掩於衙門
左獄右庠穢喧歷年悖順攝守州符嘗拜堂下惕汗
流背起而議遷得地東南高明協卜用舊增新不日
成就彩章見服儼坐有序諸坐既集率僚告成謹以
禮幣藻頌式陳明薦以禋國公饗子配

維治平五年歲次戊申正月甲戌朔三日丙子朝奉
郎尚書駕部員外郎通判永興軍州兼管内勸農事

權發遣邵州軍州事上騎都尉賜緋魚袋周淳願敢
昭告于先師充國公顏子爰以遷修廟學成恭脩釋
菓于先聖至聖文宣王惟子膏性通微實幾於聖明
誠道確夫子稱賢謹以禮幣藻巖式陳明獻從祀配
神

賦

拙賦

或謂予曰人謂子拙予曰巧竊所耻也且患世多巧
者喜而賦之曰巧者言拙者默巧者勞拙者逸巧者
賊拙者德巧者凶拙者吉嗚呼天下拙刑政徹上安

下順風清弊絕

詩

題門扉

有風還自掩無事書常閉開闔從方便乾坤在此間

題濂溪書堂

廬山我久愛買田山之陰田間有清水清泚出山心
山心無塵上白石磷磷沉滌浚來數里到此始澄深
有龍不可測岸木寒森森書堂構其上隱几看雲岑
倚梧或款枕風月盈中襟或吟或冥默或酒或鳴琴
數十黃卷軸賢聖談無音壺前即嶙峋外桑麻林

芋蔬可卒歲。絹布足衣衾。飽暖大富貴。康寧無價金。
吾樂蓋易足。名濂朝暮箴。

書窓夜雨

秋風拂盡熱。半夜雨淋漓。透屋是芭蕉。一枕高響圍。
恰似釣魚舡。蓬底睡覺時。

石塘橋晚釣

濂溪溪上釣。思歸復思歸。釣魚船好睡。寵辱不相隨。
肯爲爵祿重。白髮猶羈縻。

靜思篇

靜思歸舊隱。日出半山晴。醉榻云籠潤。吟窓瀑瀉清。

閑方為達士。忙只是勞生。朝市誰頭白。車輪未曉鳴。
贈譚虞部致仕

清時望即真。白首故鄉歸。有子紅藍綬。將孫着綵衣。
松喬新道院。鶴老舊漁磯。知止自高德。寧為遁者肥。

天池

斯須暮雲合。白日無餘暉。金波從地湧。寶鏡穿林飛。
僧言自雄誇。俗駭無因依。安知本地靈。發見隨天機。

遊大林

三月山房暖。林花互照明。路盤層頂上。人在半空行。
水色雲含白。禽声谷應清。天風拂襟袂。縹緲覺身輕。

宿崇聖

公程無暇日。暫得宿清幽。始覺空門客。不生浮世愁。
盪。泉。喧。古。洞。晚。磬。度。危。樓。徹。曉。都。忘。寐。心。疑。在。沃。州。

題浩然閣

劉侯戴武弁。政則心吾儒。士茂先興學。事賢勤讀書。
猷。為。莫。不。善。才。力。蓋。有。餘。西。北。方。求。帥。浩。然。寧。久。居。

題寇頌之道院壁

一日復一日。一杯復一杯。青山無限好。俗客不曾來。
往。事。一。如。此。朱。顏。安。在。哉。寄。語。地。上。客。歷。亂。竟。誰。催。

憶江西提刑何仲容

箇似香為友。松何枯向春。茶未大澤重。殺去繡衣新。
畫作百年夢。終歸一窖塵。看心雙淚下。無復見賢人。

劔門

劔立溪峯信險深。吾皇大道正天心。百年外戶都無
閉。空有闕名點貢琛。

春晚

花落柴門掩夕暉。昏鴉數點傍林飛。吟餘小立闌干
外。遙見樵漁一路歸。六何減字蘇州

題太顛壁

退之自謂如夫子。原道深排佛老非。不識人顛何似

春歎書珍重更留衣

牧童

東風放牧出長坡
誰識阿童樂趣多
歸路轉鞭牛背
上。笛聲吹老太平歌。

經古寺

琳宮金刹接林巒
一徑潛通竹徑寒
是處塵埃皆可
息。時清終未忍辭官。

同友人遊羅叢

聞有山叢即去尋
亦躋雲外入松陰
雖然未是洞中
境。且異人間名利心。

題惠州羅浮山

紅塵白日無閑人。况有魚緜繫此身。閑上羅浮閑送日。浩然心意復吾真。

題鄧州仙都觀

山疊江上虬龍活。殿倚雲中洞府深。欵想真風杳何在。偃松喬栢共蕭森。

宿山房

夕厭塵念衆。靜元憐微。猶乏買山錢。徘徊真境不能大。且寄雲房一榻眠。

遊赤水縣龍多山書山臺觀壁

到官處處須尋勝。惟此合陽無勝。尋赤水有山仙甚
古攀躋聊足到官心。

喜同費長官遊

尋山尋水侶尤難。愛利愛名心少閑。此亦有君吾甚
樂。不辭高遠共躋攀。

和費君樂遊山之什

雲樹巖泉景盡奇。登臨深恨訪尋遲。長樓未得於何
記。猶有君能雅和詩。

江上別石郎中

落葉。蟬。聲。古。渡。頭。渡。頭。人。擁。款。行。舟。別。離。情。似。長。江。

水遠亦隨公。日夜流何減。太白

香林別趙清獻

公暇頻陪塵外遊。朝夫仍海送行舟。軒車更共入山脚。旌旆且從留渡頭。精舍泉聲清灑灑。高林雲色淡悠悠。談終道與愁言去。明日瞻思上郡樓。

同石守遊

朝市誰知世外遊。杉松影裏入吟幽。爭名逐利千繩縛。度水登山萬事休。野鳥不驚如得伴。白雲無語似相留。傍人莫笑凭欄久。為戀林君作退謀。

任所寄鄉閨故舊

老子生來骨性寒。宦情不改舊儒酸。停盃厭飲香醪
味。舉筋常餐淡菜盤。事冗不知筋力倦。官清贏得夢
魂安。故人欲問吾何况。為道春陵只一般。

書

二十六叔書

姪男惇順答孟秋猶熱伏惟二十六叔三十一叔諸
叔母諸兄長尊體起居萬福周興未如安樂喜無盡
惇順守官於外東新婦幸如常不勞憂念來春歸鄉
即遂拜侍伏望順時倍加保愛不備姪男惇順狀上
二十六叔三十一叔諸叔毋諱兄長座前七月六日

夜 諸弟諸姪安樂好將息好將息

與仲章姪書

仲章夏熱計新婦男女安健我此中與叔母季老通

老韓姐善二以下並安迤遞中得克公加贈官誥贈

諫議大夫象門率率事汝備酒果香茶詣墳前告

聞先公諫議也未相見千萬好將息不具叔付仲章

六月十四日 諸處書立使周一父子送去叔母韓

姐傳語汝與新婦姪兒姪女各計安好將息好將息

百一百二附兄嫂起居之問善二與新婦安安汝切

不得來周翁夫妻安否周一父子看守墳塋小心否

周幼二安否如何也

與傅秀才書

惇實頓首傳君茂才足下昨日飯會上草草致書不
識已達否日惟履用休適惇實自春來鄙事併多又
新守將至諸要備辦稍有一日空暇則或過客或節
瓦或不特聚會每會即作詩雅則雅矣形劣亦率故
尚未有意思為足下作策問勿訝勿訝遂州平紋紗
輕細者恐得好皂者告買一疋自要作夏衫并買襪
蒲綾袴段二箇碎事煩忙愧悚急遣人探新守
次走筆不謹喧煥加愛不宣惇實頓首傳君茂才足

下

慰李才元書

惇實頓首變故不常竊審尊夫人太君奄棄榮養伏
惟號天永慕難以勝處罔極柰何孝思柰何敢冀節
哀以從中制卑情不任苦痛之至謹奉疏以慰不宣
謹疏四月某日汝南周惇實疏上

元公年表

宋真宗天禧元年丁巳月日先生生于道州營道縣之

營樂里諱敦實字茂叔後避英宗舊諱改惇願維周

之先自帝嚳生后稷至太王邑下周後遂以為氏漢

興封周後於汝南先生蓋其後也世家青州遠祖諱

崇昌唐永泰中為兼白二州太守因卜居道之寧遠

縣大陽村其裔孫虞賓有子十二人中子從遠始徙

居營道從遠生智強智強五子長識別本天聖五年

王堯臣榜第二甲及第終汀州上杭縣令次鐸次正

皆不仕次輒成次伯高列本舉進士某年特奏名迪

功即輔成即先生父也大中祥符八年蔡齊榜六舉

以上特奏名賜進士出身終賀州桂嶺令沒葬故居

之側半里許累贈諫議大夫先娶唐氏生礪礪生仲

章唐卒左侍禁鄭燦其先成都人隨孟氏入朝因番

于京師有女先適盧即中盧卒諫議以為繼室是生

先生營樂里者即濂溪保也東距郡城二十里有水

縈紆如青羅帶是曰濂溪周氏家其上先生晚寓靈

阜構書堂前臨溪水亦以濂溪名之學者宗之遂稱

為濂溪先生云

乾興元年壬戌先生年六歲

仁宗天聖元年癸亥先生年七歲

天聖七年己巳先生年十三志趣高遠瀟溪舊有橋橋
有小亭先生常釣遊其上吟弄風月

天聖八年庚午先生年十四瀟溪之西十里有山拔聳
中為巖洞門通東西當洞之中虛其頂圓象月之望
離而東西視之則如月上下弦焉故俗呼為月巖先
生好遊其間世傳先生睹此而悟太極理或然也

天聖九年辛未先生年十五先是諫議公已卒是年鄭
侍禁之子龍圖閣學上珣令先生同母兄盧惇文挈

之遂皆母懷居縣太君自營道入京師依舅氏龍圖
公知先生遠器愛之如子公以博名子因以博名先
生而盧氏子亦名博文博文即太君先適盧即中所
生也

明道元年壬申先生年十六

景祐元年甲戌先生年十八

景祐三年丙子先生年二十始冠行誼著聞龍圖公以
叙例應蔭子乃奏補先生試將作監主簿

按先生娶陸夫人當是此年乃職方郎中參之女
也

景祐四年丁丑先生年二十一七月十六日遷居縣太
君鄭氏卒塋於潤州冊徙縣龍圖公之墓側

寶元元年巳知先生年二十二

康定元年庚辰先生年二十四除從吏部調洪州分寧
縣主簿

慶曆元年辛巳先生年二十五先生序彭應求詩自言
慶曆初為分寧主簿當是此年時分寧縣有徽父不
決先生至一訊立辨邑人驚詫曰老吏不如也嘗被
臺檄攝袁州廬溪鎮市征局鮮事衣之進士來講學
於公齋者甚衆

慶曆四年甲申先生年二十八部使者以為才奏舉南安軍司理崇軍

慶曆五年乙酉先生年二十九南安獄有囚法不當死轉運使王逵欲深治之逵苛刻吏無敢相可否先生獨力爭之不聽則置手版歸取告身委之將去曰如此尚可仕乎殺人以媚人吾不為也逵感悟囚得不死且賢先生薦之於朝

慶曆六年丙戌先生年三十六理寺寺丞知虔州興國縣程公珣假倅南安視先生氣貌非常人與語果知道者囚與為友令二子師事之後每遷授當舉代輒

以先生名聞二子即明道伊川也時明道年十五伊
川年十四耳故明道傳云自十五六特與弟頤聞周
淳實論學遂厭科舉之習慨然有求道之志其後先
生作太極圖獨手授之他莫得聞焉是年冬以轉運
使王達薦移郴州郴縣令先生至縣首脩學校以教
人有修學記

慶曆八年戊子先生年三十二知州事職方員外郎李
初平知其賢不以屬吏遇之嘗聞先生論學嘆曰吾
欲讀書如何先生曰公老熟及矣某請得為公言之
初平遂日聽先生語二年果有得

皇祐元年己酉先生年三十三李初平卒子幼先生曰
吾事也為護其喪歸塋之往來經紀其家始終不懈
皇祐二年庚寅先生年三十四改郴州桂陽令

皇祐五年癸巳先生年三十七先生在柳桂皆有治績
諸公文薦之

至和元年甲午先生年三十八用薦者言改大理寺丞
知洪州南昌縣南昌人見先生來喜曰是能辨分寧
疑獄者吾屬得所訴矣於是更相告語莫遠教命蓋
不惟以得罪為憂而又以汙善政為耻嘗得疾更一
日夜始甦友人潘興嗣視其家服御之物止一敝篋

幾不滿百

嘉祐元年丙辰先生年四十改太子中舍會書合荆判
官事先生性好山水游峽至秭歸聞龍昌洞之勝與
廬陵蔣槩洪涯彭德純遊焉蔣記之事見秭歸集十
一月至合州

嘉祐二年丁酉先生年四十一正月作彭推官宿崇勝
院詩序九月回謁御史牒稱解元才即今不詳其為
誰氏子當是去年鄉貢今年南省下第而歸者聞先
先講學故來求見耳遂亟傳者伯成少有俊才年十
四薦於鄉先生妻黨陸丞自小溪解官東歸過合陽

為先生言傳之為人先生致書於傅傅答書云執事
以濟眾為懷神所勞瘁故得高士與施至術而心朋
遠寓名方豈不盛哉賤子聞之弗勝喜蹈書言心朋
意似拊二程後言又云遠遠高賢鄙夫復萌曩接高
論固多餘意行惡坐想嘿有所得不遂溺於時昏失
於古道也特傳已來合陽見先生矣後書又謂蒙示
姤說意遠而不迂詞簡而有法盧次山亦謂詞深義
密如軻之文次山必盧即中族黨之知學者是歲先
生轉銀中丞賜五品服仍判合州

嘉祐三年戊戌先生年四十二傅伯成請策題先生未

暇作因遣人至遂寧探聞新合州使君有書寄傅是
年解雲縣君陸氏以疾卒

度氏正曰先生在合州與同事者三人何涉董宗

式李鄴何涉之來在先生前李鄴在四年十月惟
宗式在三年三月此所探新使君為宗式無疑也

嘉祐四年己亥先生年四十三左丞蒲宗孟閩中人太
常丞蒲師道之子也左丞從蜀江道于合見先生相
與歎語連三日夜而嘆曰世有斯人歟乃議以其妹
歸之是為先生繼室

嘉祐五年庚子先生年四十四被臺檄按赤水縣簿書

與其縣令費琦遊龍冬山有詩刻石六月十九日先生解僉判職事還京師時呂給事陶為鞫梁令有送先生序并詩先生在合四年人心悅服事不經先生手吏不敢決苛下之人亦不從既去相與祠之南禪先生在合士之從者衆先生尤稱張宗範有文有行故各其所居之亭曰養心而為之說示以聖學之要東歸時王荆公年三十九為江東提點刑獄已踰通儒先生遇之與語連日夜荆公退而精思至忘寢食度氏正曰劔門集有先生詩先生在合陽無因過劔門或是過關中蒲氏聞劔門之勝因徃遊耳

嘉祐六年辛丑先生年四十五三月遂寧傅者登第先生賀之刺云從表殿中丞前合州從事周某謁賀新恩先輩溥第尋遷國子博上通判慶州道出江州酷愛廬山之勝有卜居之志因築書堂於其麓前有溪發源蓮華峯下潔清緝寒下合於湓江先生濯纓而樂之遂寓名以濂溪謂友人潘興嗣曰此濂溪者異時與子相從於其上歌詠先王之道足矣既至慶州者趙清猷也先生前在合陽清猷為部使者人或讒先生清猷臨之甚威而先生處之超然清猷疑終不釋至是熟視先生所為執其手嘆曰幾失君矣

今日乃知周茂叔也薦之於朝論之於上大夫終其身

既按潘興嗣作墓誌云先生嘗過潯陽愛廬山因築室溪上名曰濂溪書室且語興嗣曰此濂溪者異時與子相從於其上歌詠先王之道足矣此君之志也孔文仲祭文云廬山之麓是曰九江皆非上人來寓其邦此頌彼期終為隣里如何今歸乃弔公子觀此則先生卜居廬山實其雅志而築室非末年之事審美舊譜載之熙寧壬子既未諦考近日先生里人費椿移之嘉祐庚子亦未為確今

詳加考定當是此年

嘉祐八年癸卯先生年四十七行縣至雩都邀餘抗錢
建侯四明沈幾聖遊羅巖正月七日刻石四月英宗
登極遷虞部員外郎仍判虔州贈父桂嶺君爵郎中
五月作愛蓮說

英宗治平元年甲辰先生年四十八冬虔州民失火焚
千餘家朝廷行遣差替遂對移通判永州時程師孟
知洪州以詩送行有永水自然勝瀨水浯溪應不讓
瀨溪沙頭候吏憐旗脚曉上鄉人待馬蹄之句

既按舊譜虔民失火宅火移官一事載之去年癸

知費氏更定為今年孟據蒲示孟春先生詩為證
宗孟云乙巳歲除日收武昌惠書知已赴官零陵
故知失火移官必在甲辰而蒞永則在乙巳也不
然矣知失火移官甲辰在永何以乙巳得遊廬山
且經武昌道乎費氏又口舊載費氏失火事稱
先生時出行縣不自辨明韓魏公曾魯公皆知之
遂對移通判永州愚以為先生出縣不出縣姑不
必論然失火竹遺乃朝廷之公法先生以道自處
以民瘼為任凡民有失皆已之辜豈容有自辨保
官之理假令先生不出行縣能使愛民之必不焚

乎故失火不必為先生諱而出行不辯不足為先生美談也况出行縣乃癸卯年事非甲辰年事也
按此論甚正故著之

治平二年乙巳先生年四十九先生之水道經江州三月十四日同宋復古遊廬山大林寺有詩江南西路運使李大臨才元以詩謁先生下瀟溪云蒼前翠靄逼廬山門掩寒流盡日閑李尋丁憂先生以疏慰之經武昌道中以詩一軸寄蒲左丞蒞任當在夏之仲季是年四月趙清猷復拜成都聞先生移永寄詩云君向瀟溪湖外竹伴蒲仍喜便歸程

治平二年丙午先生年五十有書與其族叔及諸兄云
周興來知安樂言無盡來春歸鄉即遂拜侍又有詩
寄鄉人云故人若問吾何况為道春陵正一般

治平四年丁未先生年五十一先生素貧初入京師鬻
其產以行擇留美田十餘畝畀周興耕之以洒掃其
父即中之墓至是自永州移文營道言之因携二子
歸喪墓三月六日與鄉人蔣瓊區有鄰歐陽麗理掾
陳賡同遊含輝洞洞在營道縣南二里刻石其陰八
日營道給吏文付周興從先生之言也神宗登極遷
朝奉郎尚書駕部員外郎加贈父諫議大夫六月十

四日與其兄之子仲章手帖云可具酒果香茶詣墳
前告聞先公諒議也先生在水州二年嘗作拙賦
既去永人思之為立祠題曰康功切寅明仲有詩云
千古濂溪周別駕一篇清獻錦江詩是秋攝邵州事
邵之學在牙城中左獄右庾卑陋弗稱先生始至度
城東南高明之地遷焉逾月而成是年九月先生自
邵陽發過以改定同人說寄傅伯成傅時知嘉州平
羌縣明年傳復先生書云茲寄祝同人說徐褻熟讀
較以舊本改易數字皆人忘所不到處宜乎人宗師
仰慕之不暇也

神宗熙寧元年戊申先生年五十二荆湖北路轉運使
孔延之為先生序荆州遷學記先生自作釋菜文俱
書治平五年三月時改元詔尚未到故仍稱治平五
年耳後人徇尋常便利之說輒徙其學他所說道元
年知州事始復其舊張敬夫詳其事而記之呂
正獻公公者在侍從聞先生名力薦之曾清獻公在
中書擢授廣南東路轉運判官有啓謝正獻公云在
薄宦有四方之遊於高賢無一日之雅

熙寧三年庚戌先生年五十四轉虞部郎中擢提點廣

南東路刑獄

熙寧四年辛亥先生年五十五以正月九日領提點刑
獄職事行部至潮州有題大顛堂詩時虞部卽中杜
諮知端州禁百姓采石獨知州占斷人號爲杜萬石
先生惡其奪民之利因請凡仕於州者買石硯毋得
過二枚遂爲著令是上盡心職事務在矜恕得罪者
自以爲不寃俄得疾聞水齧仙居縣太君鄭氏墓遂
乞南康八月朔移知南康軍十二月十六日啟葬鄭
大君於江州德化縣廬阜清泉社三峯山葬畢曰強
疾而來爲葬耳今猶歎以病污毫髮耶上南康印分
司南京而歸

熙寧五年壬子先生年五十六先生酷愛蠶桑向營集
書堂至是遂定居焉先生平日俸祿悉以周宗族奉
賓友及分司而歸妻子饘粥不給慨然不以為意

熙寧六年癸丑先生年五十七時清獻公再尹成都聞
先生去常拜章乞留朝命及門而先生以疾卒笑時
六月七日也二子壽燾皆太廟齋即以十一月二十
一日葬先生於仙居縣太君墓左從遺命也先生所
著有太極圖易說易通批賦愛蓮說養心亭說及詩
文數十首易說逸餘並作於世先生後以二子顯累
贈宣奉大夫嘉定三年賜諡曰元淳祐元年封汝南

自從祀孔子廟延元延祐六年加封道國公國朝
景泰七年官其後裔世襲翰林院五經博士